


† Giusep Aluis Cavegn-Jacomet, Sedrun

Nunspitgadamein e tut discus eis el ius naven, nies bien Luis, sco el vegneva numnaus da tuts. In bab plein quita; in proxim survetscheivel, in amitg fidau e honzeli ei buca pli, e la cuminanza ei pli paupra, ha piars in vischin che derasava tonta cordialitat e harmonia. En gronds tratgs repassein nus siu viadi terrester.

Il car defunct, Luis Cavegn, ei naschius ils 9 da zercladur 1920 a Rueras-Tujetsch. Nus vesein el cheu spes geniturs Duri Vigeli Cavegn e Maria Marta, nata Monn, el ravugl d'ina famiglia da 12 affons. Cheu ha el empriu da viver en cuminanza, da segidar e da risguardar. Da siu bab, in pur che vev'adina en egl in menaschi exemplaric, ha el artau siu bien spért da lavur. Senza dubi, il Luis ha giu ina ventireivla affonza, bials onns da scola primara e secundara. – Tier Toni Berther ha il svegliau ed inschignus mattatsch fatg igl emprendissadi da scrinari. Siu garsunadi ha el lu passentau a Flem ed a Ruera tier Vigeli Caduff. Sia forza era propi la construcziun da mobilias.

Igl onn 1952 ei il Luis sospausus culla giuvna Castgina Jacomet da Sedrun. Sia buna e fidada consorta ha regalau ad el 7 affons: 4 buobs e treis mattatschas. Era sia casa han las fridas dil destin buca schanegiau. Ei ha tuccau da satrar siu affon Pius, ch'e negaus da nov onns, ei ha giu num supportar las consequenzas d'in accident ch'in da ses buobs ha giu cun in projectil. Gie, veramein, el ha giu sias cruschs, mo el ha era giu la grazia e la forza da purtar ellas en resignaziun cristiana.

Da lezzas uras, entuorn ils onns 50, er'ei magari magher, era la lavur scarta e la giuvna lètg ei setratga naiven ed anflau occupaziun e fadigia a Flums e pli tard a Rheinfelden. Denton era la situazion economica semidada e suenter 6 onns ha l'encarscha-detgna per la patria clamau anavos il Luis. La famiglia ei secasada a Sedrun, nua ch'il defunct ha aviert in'atgna scrinaria. Tgei plascher dad esser sez signur e patrun! El luvratori



era il Luis egl element, cheu era el da baul e da tard! Scrinari, gliez era el in da vaglia e ses products eran exacts en mintga detagi. Il «schar stgisar» gliez enconuscheva il defunct buca, e zatgei buca perfetg bandunava mai sia scrinaria. El ditgava ni temps ni gudogn, mo l'ovra stueva esser cumpleina. Era culs vischins ei il car tra passau segidaus ed ha cooperau nua ch'el ha saviu e pudiu.

Ils davos onns ha ina nauscha malsogna sgurdinau sias forzas pli e pli ed il cuort viadi si en siu luvratori vegneva pli e pli liungs e fadigius. Surura, ils 8 da schaner 1983, ha il bien amitg concludiu siu viadi terrester e surdau sia olma al Scaffider. Tgeuamein eis el vivius, tgeuamein eis el passaus sulla sava dalla patria celestriala. In bab plein quita; in vischin survetscheivel, in amitg honzeli e fidau, in mistergner cunsienzius ha bandunau il terrester. Igl ei vegniu pli vit en famiglia, pli vit sisum il vitg.

Alla famiglia en malencurada exprimin nus nossa sincera condolentscha, al car Luis engraziein nus per tut quei ch'el ha contribuiu alla veta communabla. Dieus detti ad el il raus perpeten!

V.B.